


TEZAUUR LITURGIC
10 FEBRUARIE

ACATISTUL
SF. CUVIOS
LONGHIN
DE LA
KORIAJEMSK



MOSCOVA, 2000



АКАФИСТ

преподобному отцу нашему

Лонгину, игумену

Коряжемскому, чудотворцу

Кондак 1

Избранный Господом от юности быти сокровищницею Его благодати, преподобне отче Лонгине, с верою, надеждою и любовью припадаем к раце честных мощей твоих, ты же, яко имеяй велие дерзновение ко Господу, свободдай нас от всякаго зла, да со умилением зовем ти:

Радуйся, Лонгине, заступниче наш и предивный чудотворче.

Икос 1

Ангела нравом, аще и человек бе, зрим тя, преподобне: ты бо, от юности к житию иноческому влекомый, токмо в летех совершенных пришел еси во обитель Павло-Обнорскую и ту поселился еси. Испытанный же во всяцем послушании, удостоен был еси образа ангельска и прилагал еси труды к трудом, подвизая взывати тебе:

Радуйся, измлада единого на потребу искавый; радуйся, послушанием безропотным гордость в

себе искоренивый.

Радуйся, отречением от благ земных всякаго стремления к любостязанию избежавый;
радуйся, исполнением неуклонным устава иноческаго от всех обычаев мирских ся оградивый.

Радуйся, преподобнаго Павла Обнорскаго в пример себе поставивый;
радуйся, в преподобном Симоне друга по сердцу твоему избравый.

Радуйся, душеполезными беседами с другом тем яко пищею здоровою себе питавай;
радуйся, пример сицеваго согласия всем иноком показавый.

Радуйся, Лонгине, заступнице наш и предивный чудотворче.

Кондак 2

Видяще, яко многолюдие обители Павло-Обнорския нарушало тишину жития иноческаго и вело к неким нестроениям, ты, преподобне, от всея души возжелал еси удалитися из обители в пустыню, да в тишине оныя чистым сердцем воспоеши Спасителю Богу: Аллилуиа.

Икос 2

Разумом, в иночестве умудренном, познал еси, преподобне, сладость безмолвия пустыннаго и купно с другом Симоном отшел еси в весь

Сольвычегодску, идеже друг той, яко zde рожденный, восхоте показати тебе место, пустынному житию потребное, ты же, яко пустынножитель совершенный, отходя из обители Павловы, приял еси с собою токмо един крест деревянный, данный ти в благословение от обители Павловы. Прославляя сицевое твое произволение, взываем ти:

Радуйся, пустыннолюбия ревнителю;
радуйся, пустынников древних: Антония, Павла, Арсения последователю.

Радуйся, и в пустыню по благословению обители отшедый;

радуйся, крестоносче непобедимый.

Радуйся, всякое стяжание единым крестом заменивый;

радуйся, любовь твою ко кресту житием твоим доказавый.

Радуйся, преискренним другом святому Симону явивыйся.

Радуйся, Лонгине, заступниче наш и предивный чудотворче.

Кондак 3

Силою Божиею охраняемый, достиг еси, преподобне, купно с преподобным Симоном, веси Сольвычегодския и ту, отдыха ради, во обители Борисоглебстей поселился еси,

благодарне взывая Путеводителю Господу:
Аллилуиа.

Икос 3

Имея в душе твоей желание непреборимое
пустыннаго жития, ты, преподобне, не по
мнозех днех вкупе с преподобным Симоном
остависта обитель Борисоглебскую и текоста в
пустыню по шуиему берегу реки Вычегды до
устья реки Коряжемки, идеже за пятьнадесять
поприщ от града Соли друг твой указа тебе
место пустынное, еже узрев, преподобне,
воскликнул еси в восторзе духовнем: «Се покой
мой, zde вселюся». Посем оба друга начаста
рубити лес и расчищати место и построиста
исперва келию и часовницу, последи же храм во
славу и честь святаго Николая — Мирликийскаго
Чудотворца, и очистиста место ради посева
зерна, да будева питатися от труда рук своих.
Толикое усердие твое к пустыни ведяще, по
долгу вопием ти:

Радуйся, горлицо пустыннолюбная, вся красная
мира сего ради пустыни оставившая;
радуйся, душе святая, пустыню яко дар Божий
восприявшая.

Радуйся, от трудов рук твоих себе питавый;
радуйся, в трудех сих велие ограждение от
мечтаний душевредных и уныния обретый.
Радуйся, пути стропотны к пустыни твоей в

пути гладки обративый;
радуйся, труды и подвиги твоими путь к
царствию небесному тебе самому и
последователем твоим свободен сотворивый.
Радуйся, труды твоими пустыню
уплодоносивый;
радуйся, пример трудолюбия иноком и миряном
показавый.
Радуйся, Лонгине, заступнице наш и предивный
чудотворче.

Кондак 4

Бурь моря житейскаго избежавый и пристанище
тихое в пустыни обретый, избави и ны от
треволнений житейских и душепагубного
уныния, да с верою и любовью воспоем
Спасителю всех Богу: Аллилуиа.

Икос 4

Слыша в Священном Писании, яко аще кто
любит отца, или мать, или братьев, сестры
паче Бога, несть Его достоин. Ты, преподобне,
во отшествии друга твоего преподобного Симона
в пустыню Сойгинскую, узрел еси
промыслительную волю Божию и отпустил его с
миром. Сицевая покорность твоя воле Господней
подвизает возглашати тебе:
Радуйся, Единого Господа твоего всем сердцем и
всею душою твоею возлюбивый;

радуйся, токмо в Бозе Едином спасение твое узревый.

Радуйся, молчание яко лучший путь ко спасению почитавый;

радуйся, ради того же спасения другом твоим оставленный.

Радуйся, светом подвигов пустыню озаривый; радуйся, светом тем многих чающих спасения привлекий.

Радуйся, заблуждших в вере чудеса твоими просвещаеши;

радуйся, благодатию от Бога тебе данною враги наша отгоняеши.

Радуйся, Лонгине, заступниче наш и предивный чудотворче.

Кондак 5

Боготечною звездою в веси Сольвычегодстей явился еси и многих подвиги твоими удивил еси и ко Христу привел еси, преподобне, подвизая взывати Ему, яко источнику света и радости вечныя: Аллилуиа.

Икос 5

Видевше вси чаявшии душевнаго спасения людие долготерпение твое и твоя подвиги, преподобне, начаху стекатися в пустыню твою и просити тя прияти их в пустыню и обитель общежительную устроить; ты же, преподобне,

аще и стремился еси к молчанию и житию
отшельническому, обаче по воле Божией, иже всем
человеком хочет спастися и в разум истины
прийти, ускорил еси общежитие в пустыни
твоей устроить и был еси первым игуменом его,
сего ради взываем ти:

Радуйся, воли Божией верный исполнителю;
радуйся, всех чающих спасения мудрый
учителю.

Радуйся, себялюбия искоренителю;
радуйся, общежития спасительнаго многим
устроителю.

Радуйся, Святителя Николая Мирликийскаго,
егоже икона во обители прославися чудесы,
усердный слуго;

радуйся, покрову угодника сего себе и обитель
твою вручивый.

Радуйся, плавающим по волнам моря
житейскаго пристанище благоотישное;
радуйся, обители твоея первый игумене.

Радуйся, Лонгине, заступнице наш и предивный
чудотворче.

Кондак 6

Проповедницы трудолюбия и подвигов твоих,
преподобне, являются до сего дня кладезь,
рукама твоима ископанный, и власяница
жестокая, юже на теле твоём носил еси, и

подвизают верных взывати Подвигоположнику Христу Богу: Аллилуиа.

Икос 6

Возсиявый в пустыни зарею пресветлою и согревая любовью христианскою всех, во обитель твою притекающих, достиг еси, преподобне, предела жития твоего и мирно преставился еси к небесным обителем, сохранивый до гроба смирение твое и заповедавый положить тело твое у прага храма, да вси входящие в онь и исходящие из него попирали е ногама своима. Мы же, недостойнии, токмо на милосердие твое уповающи, дерзаем взывати тебе:

Радуйся, любви христианския исполненный;
радуйся, мирныя христианския кончины
удостоенный.

Радуйся, по смирению твоему место погребения
твоего у прага храма избравый;
радуйся, за смирение в небесныя обители
введенный.

Радуйся, житием твоим высоту иночества
показавый;
радуйся, яко по преставлении твоем руку
помощи многим нуждающимся простираеши.
Радуйся, сердца многих к Богу привлекаеши.
Радуйся, Лонгине, заступнице наш и предивный
чудотворче.

Кондак 7

Хотяй в житии твоём всем вся быти, преподобне, да всяко некия спасеши, основал еси обитель Коряжемскую, яже и по преставлении твоём имея в тебе покровителя и заступника, воспеваем немолчно Господу Человеколюбцу: Аллилуиа.

Икос 7

Новый неисчерпаемый источник благодати Божией открывся в мошех твоих, преподобне, егда Господь наш Иисус Христос восхоте прославити оныя и избавити я от небрежения, и егда некий воевода, устюжский князь Владимир, впаде в расслабление, ты, преподобне, по воле Божией явился еси расслаблену в сонном видении и подал еси ему совет: аще хочет здрав быти, да посетит обитель твою и накажет игумену оныя пренести мощи твоя на подобающее им место, и при сем ты указал еси болящему и место погребения твоего, и место, идеже довлеет положить мощи твоя по пренесении. Егда же воевода той прибыл впервые во обитель, точно указа место твоего погребения, тогда же обретен бысть гроб с мощами твоими и пренесен бысть на указанное тобою место, болящий же воевода внезапно исцелен бысть, прославляя Господа и тебе, яко великаго чудотворца. Сего ради вопием ти:

Радуйся, за смирение и воздержание нетлением прославленный;
радуйся, обретением мощей твоих обитель твою обрадовавший.

Радуйся, пренесение мощей сих исцелением воеводы ознаменовавший;

радуйся, нетлением мощей твоих плоды смирения и подвигов твоих показавший.

Радуйся, трудолюбцы и униженных мира сего возвышающий;

радуйся, гордыню мудрых сынов века смиряющий.

Радуйся, из гроба зол грешных извлекающий;

радуйся, обретением мощей твоих и чудеса всякое сумнение в святости твоей отгоняющий.

Радуйся, Лонгине, заступнице наш и предивный чудотворче.

Кондак 8

Странное явление твое иноку Иродиону во время совершения панихиды при гробе твоем, преподобне, ведяще, устранимся мира и ум на небеса возложше, прославим Бога Спасителя нашего, дозволившаго ти явиться, яко живу и сущу и воспевати с сущими на земли Ему, Всемогущему: Аллилуиа.

Икос 8

Весь бе в вышних, но и нижних не оставлял еси и ныне не оставляеши, преподобне, зане многих исцелил еси, в них же быша: припадочная раба Божия Агриппина, отравленная за целомудрие раба Божия Анна, и болящий ногама иерей Божий Гавриил, иже вси у гроба твоего исцеления получиша, и ныне многих исцеляеши, подвизая чтущии тя взывати:

Радуйся, ослабленных восстановителю;
радуйся, целомудрия охранителю.

Радуйся, веры православных утвердителю;
радуйся, прилогов вражиих отгонителю.

Радуйся, яко послушанием и смирением многих на путь истинный направляеши;
радуйся, яко мир и согласие в насельниках обители сохраняеши.

Радуйся, яко исцеленных тобою ко Господу Спасителю нашему приближаеши;
радуйся, сущих в скорбех нечаянною радостию скоро утешаеши.

Радуйся, Лонгине, заступнице наш и предивный чудотворче.

Кондак 9

Вси, видевшии тя по преставлении твоём, преподобне, аки жива суца, вельми удивляхуся и, разумев тя яко Ангела-хранителя веси

Сольвычегодстей, взывах во умилении Богу
Всемогущему: Аллилуиа.

Икос 9

Витии многовещанныя недоумеют уяснити, како
некоего земледельца Коряжемския вотчины по
имени Луппа исперва наказал еси безумием и
болезнию за богохульство, последи же ему,
раскаявшуся и лежащу на одре болезни, явился
еси, преподобне, и начал еси веяти над ним
твоею одеждою и повелел еси идти во обитель
твою, отправить молебн Спасу и Пречистей Его
Матери и поклонитися гробу твоему и, абие,
исполнив наказ той, Лупп здрав содеяся,
подвизая взывати тебе:

Радуйся, богопочтения ревнителю;

радуйся, богоотступников наказателю.

Радуйся, грешников кающихся пред Богом
ходатаю;

радуйся, в милосердии твоём Христу верный
последователю.

Радуйся, подвластных тебе отец чадолюбивый;

радуйся, в трудех их усердный пособниче.

Радуйся, добрый пастырю стада Христова;

радуйся, свирель, утешающая овцы, тобою
стерегомья.

Радуйся, Лонгине, заступниче наш и предивный
чудотворче.

Кондак 10

Спасти хотя душу единого от иноков
коряжемских, иже впаде во уныние и нача
сумлеваться во святости твоей, преподобне,
благоволил еси явиться иноку тому, аки живым
и на одре лежащим. И егда инок той, страхом
одержимый, не смеяше приблизиться ко одру
твоему, ты разрешил еси иноку прийти к тебе и
благословил еси его, и от того часа радостию
исполнися сердце инока того, и веруя в святость
твою, с веселием взываше Господу Утешителю:
Аллилуиа.

Икос 10

Стеною крепкою явишася мощи твоя,
преподобне, и привлекоша многих боголюбцев, в
них же един из первых бысть блаженный
Александр, епископ Вятский и Великопермский,
постриженник Коряжемский, иже устрои
иждивением своим во обители твоей храм
каменный во славу и честь Пресвятыя
Богородицы честнаго Ея Благовещения с
приделом Святителя и Чудотворца Николая, и
честныя мощи твоя в храме сем приведошася у
полунощной страны онаго. По многих же летех
епископ Вологодский Онисифор восхоте
прославить тя, яко угодника и чудотворца,
благослови пети над гробом твоим пение
молебное взамен панихиды, преклоняся пред

волею Божиею, восхотевшею прославити тя яко угодника Божия, возглашаем ти:

Радуйся, обители твояе усердный охранителю;
радуйся, иноков унывающих мудрый
утешителю.

Радуйся, яко от чтения жития твоего мнози для души своея пользу почерпают;
радуйся, яко чудеса от мощей твоих тму неверия разгоняют.

Радуйся, яко чудеса тая и нетление твое воздати должную честь Святителей Божиих подвизают;
радуйся, яко твое попечение неоскудное упраздненную обитель твою в новей славе возстановляет.

Радуйся, яко весь Сольвычегодская память твою светло торжествует;

радуйся, яко и вся Церковь Вологодская к лику святых и чудотворцев своих тя причисляет.

Радуйся, Лонгине, заступнице наш и предивный чудотворче.

Кондак 11

Пение всеумиленное приносим Богу Спасителю нашему, даровавшему Церкви Вологодстей в тебе, преподобне, мудраго пособника в нуждах и скорбех, всегласно взывая: Аллилуиа.

Икос 11

Светозарною звездою сияют мощи твоя,
преподобне, источая чудеса велия: тако егда
падоша две главы и часть свода
Благовещенскаго храма и в оном все разрушено
бысть, гробница же твоя сокрыся от очию под
обломками и камнями и вси мнеша, яко и мощи
твоя раздроблени быша, но, о чудо
неизреченное! Егда гробница твоя освобождена
бысть от обломков и камней, вси со умилением
узреша, яко не токмо гробница и лик твой на
оной ничим же вредимы быша, но уцелел и
кивот скланый, в нем же на гробнице твоей
хранися изображение главы святаго Иоанна
Предтечи. Сего ради по долгу взываем ти:
Радуйся, Чудотворче изрядный, ему же силы
земныя повинуются;
радуйся, угодниче избранный, его же мощи
святой Иоанн Предтеча, яко великий
пустыннолюбец, от разрушения охраняет.
Радуйся, яко вси притекающие к мощем тем от
видимых зол невидимую защиту приемлют;
радуйся, яко мощи твоя обитель твою богато
украшают.
Радуйся, яко чудеса твоя неверным
сомнительное слышание;
радуйся, яко твоя верным известная похвало.
Радуйся, постников воздержание;

радуйся, преподобных радование.

Радуйся, Лонгине, заступниче наш и предивный чудотворче.

Кондак 12

Благодать избавления от всякия скорби и печали даде тебе, преподобне, Господь наш Иисус Христос, да вси благодарне славят Его, яко Благаго Промыслителя, зовуще во умилении: Аллилуиа.

Икос 12

Поюще твое равноангельное житие и прославляя твоя обильныя чудеса, молим тя, преподобне, осени наша благая дела и начинания и укрепи ны на борьбу с врагами видимыми и невидимыми, да со умилением взываем ти:

Радуйся, тяжких искушений вражеских отгонителю;

радуйся, врагов наших духовных и телесных победителю.

Радуйся, пустынников украшение;

радуйся, печалей неотметных утоление.

Радуйся, странных путеводителю;

радуйся, в пленении сущих скорый освободителю.

Радуйся, юных наставниче;

радуйся, старости поддержателю.

Радуйся, Лонгине, заступниче наш и предивный чудотворче.

Кондак 13

О пречудне и достохвальне преподобне отче Лонгине, веси Сольвычегодския отрада и утешение, с любовью прими от нас грешных малое сие хваление и умоли возлюбльшаго тя Господа даровати обители твоей и всей веси Сольвычегодстей мир, здравие, благоденствие и плодов изобилие; царству Русскому мудрость и силу и на враги победу и одоление, доблестным воинам нашим — мужество и непреодолимую храбрость; всем же нам взаимную любовь и согласие, да избавленнии тобою от страстей и грехов, непрестанно славим Господа Человеколюбца, воспевая Ему победную песнь: Аллилуиа, Аллилуиа, Аллилуиа.

Сей кондак чести трижды, посем чти икос 1: «Ангел нравом...», и кондак 1: «Избранный Господом...»

Молитва

О великий угодниче, преславный чудотворче и обители твоя богодуховенный наставниче, Лонгине преблаженне, душою на небеси Престолу всех Царя предстояй, телом же во святей обители почиваяй и различная чудеса

повсюду молитвами твоими совершай! Призри милостивно на люди предстоящя и твоего ко Господу Богу ходатайства во обдержажих нуждах просящя: вси бо мы, по множеству грехов наших, не смеем ниже возвести очес своих на небо. Ты же, яко стяжавый дерзновение, принеси за всех, к честному гробу твоему притекающих, теплыя молитвы ко Господу, еже избавитися нам от глада, потопа, труса, огня, меча и брани, от людей и от диавола бывающя, и от всякия душевныя и телесныя болезни; да сих избежавше, и Господу, Емуже предстоиши, работающе, внидем в нескончаемый покой и прославим тамо с тобою всех благих подателя Бога, всегда, ныне и присно и во веки веков. Аминь.

